

1909 年

五日刊第 42-50, 52-54 期

宣統元年七月十五日

己酉

南洋
實報

第四十二期

南洋五日官報目錄

諭旨恭錄

京朝法政

學部 奏酌擬考試畢業游學生章程摺 ● 考試游學畢業生清單

兩江奏牘

江蘇巡撫瑞 奏蘇浙淺水巡艦合為聯隊請將營制餉章立案摺 ● 又奏上海龍門初級師範學堂畢業請獎摺 ● 又奏蘇州中等農業學堂請立案片 ● 又奏派在籍補用道張登總辦江蘇農工商務局片 ● 護理兩江督部堂樊 准度支部咨前督部堂端查辦利濟公司濬浦舞弊結案辦法應准銷案文 ● 又咨湘撫部院請分別札委湖南勸業道唐步瀛等為湖南省出品協會監督總理文 ● 又批阜甯縣堵令稟會訊郭戴氏上控伊夫郭仲楡被戴璧堂子姪連班等謀殺身死訊供情形由 ● 兩江總督部堂張 札飭各署局所學堂軍營遵照館頒民政財政各表式填送文 ● 又批廣德州孀婦沈金氏稟氏子沈恭煦被冤請雪由 ● 甯藩司樊 批六合縣陶令鑄堯詳陸王氏家違禁演戲訪聞提辦事涉家丁業已解府審辦由 ● 又批如臬公立師範各學堂公稟稅契捐擬請照舊帶收或仿照興化辦法



由●又批大挑教職姜書欽等稟請禁鹽城海州米麥出口由●又批李富揚稟認盜庇盜疎縱不獲求示提懲由●又批賈王氏稟次子桂年以訐直爲義務通州因此訪提一案由●甯學司陳 牌示江西高等農業畢業生程時玠領咨赴東游學文●江南商務總局批江浦縣稟復浦口商會私刑擾民訊斷情形由●又批職員張必濤稟墻倒屋傾叩求飭讓修理由●甯屬諮議局籌辦處 批山陽文生高溥報告淮郡育嬰堂司莊舞弊懇請切實調查整頓由(附原稟)●署淮運司吳 稟督憲據正陽局徐牧稟查豫販方昌蔭等兩次稟控各節實在情形文●津浦鐵路南段購地局 申江督憲商借江邊洲地情形並錄呈合同底稿請立案文●辦理通海墾牧事宜翰林院修撰張 咨甯藩司查明陳少峰朦控蘇狼兩營兵田一案文

外省新政

東三省總督錫 奏遵 旨考察東三省情形裁併差缺撙節經費摺

藝文存略

謝午帥惠枇杷啓

樊山

諭旨恭錄

七月初八日

監國攝政王鈐章奉

上諭八月初二日祭社稷壇遣載功恭代行禮欽此

上諭資政院奏續擬院章並將前奏各章改訂開單呈覽一摺朕詳加披覽該院自職掌以下八章與現定諮議局章程實相表裏卽爲將來上下議院法之始基所擬尙屬周妥著京外各衙門一體遵行其各項細則章程仍著迅速籌擬奏請宣布餘依議單併發欽此

上諭前西安將軍長春由印務叅領洊擢京外各旗副都統補授西安將軍宣力有年克勤厥職旋經開缺來京當差茲聞溘逝軫惜殊深加恩著照將軍例賜卹任內一切處分悉予開復應得卹典該衙門查例具奏欽此

軍機大臣署名

初九日

監國攝政王鈐章奉

上諭沈秉堃奏查明文武各員賢否分別獎懲一摺雲南准補普洱府知府代理雲南府知府陳先沅署開化府知府候補知府賀宗章署麗江府知府蒙化直隸廳同知吳昌現署蒙化廳同知請補威

遠廳同知林志恂署邱北縣知縣試用知縣馮汝署彌勒縣知縣試用知縣胡國瑞既據該護督臚陳政績均著傳旨嘉獎候補知州江有文曠近匪人心迹難信試用巡檢周德懋沈涵於煙不自振拔俸滿雲州吏目王德恩嗜煙成癖巧於掩飾著一併革職江有文並勒令回籍不准逗遛阿迷州知州沈炳章聽斷不明疏於緝捕太和縣知縣張友棠迂緩無能輿情不洽均著開缺另補建水縣知縣周布南識字無多難膺民社著開缺勒令回籍認真學習試用知縣李煥綬試用鹽大使盧廷襄補用游擊蔡典臣李文庚儘先補用守備楊德清均吸食洋煙久未遵戒俱著暫行革職以觀後效江有文沈炳章張友棠均於河口案內得有保獎著一併註銷餘著照所議辦理該部知道欽此

軍機大臣署名

初十日

監國攝政王鈐章奉

上諭四川重慶鎮總兵員缺著陳均山補授欽此

軍機大臣署名

十一日

監國攝政王鈐章奉

上諭雲南昭通府知府員缺著達春補授欽此

軍機大臣署名

京朝法政

學部 奏酌擬考試畢業游學生章程摺

奏爲酌擬考試畢業游學生章程繕具清單恭摺仰祈

聖鑒事竊臣部於光緒三十二年四月奏准

考驗游學畢業生自本年始每年八月舉行一次奉

旨允准歷經遵辦在案惟考試舉行伊始一切

章程皆係暫爲擬定現在歷時既久或試驗而便於奉行或隨事而量爲通變且游學畢業人數日漸增

多一切考試規條自不無加密之處臣等公同商酌擬定考試游學生章程分爲八項辦理杜門扁試略

仿科舉取士之遺分科較藝兼取學堂積分之法嚴於去取則名器無可濫邀密於關防庶弊竇可以盡

絕謹繕具清單恭呈

御覽如蒙

俞允卽由臣部遵奉施行嗣後體察情形如尙有須續行增改

之處容臣等隨時奏明辦理所有酌擬考試章程緣由謹繕摺具陳伏乞

皇上聖鑒謹

奏宣統元

年六月十五日奉

旨依議欽此

考試游學畢業生章程清單

一考生資格 東西洋游學生應由出使大臣或游學生監督將該生等履歷入學年月所習專科及預

定畢業年限並有無曠課各節預行列表報部立案其赴部報考時應由出使大臣或各省督撫或各部

院堂官備文咨送出具切實考語方准與考東西洋游學生如係由中學堂畢業得有獎勵後出洋者必

在外國高等以上學堂肄業三年以上方准與考其未由中學堂畢業出洋者必在外國普通學堂預備

一年以上並在高等以上學堂肄業三年以上畢業者方准與考（在高等以上學校此校未畢業而轉入他校者不得以兩校年限合計惟學科程度相同之學校預經出使大臣或游學生監督允准轉學報部核准者不在此列）東西洋游學生必在大學堂及各項高等專門學堂畢業者方准與考 凡在外國中學中等程度之實業及師範學堂與爲中國人特設班次之學堂畢業者均不准與考其由爲中國人特設班次之學堂肄業轉入高等學堂之第二三年級者或由校外生畢業編入高等學堂之第二三年級者亦均不准與考凡選科畢業生如其所習學科不及該學堂所定各科四分之三者（設如某學堂所定應習之學科共十六種而該生所選習之學科不及十二種）不准與考 二查驗文憑 游學畢業生赴部報考應將畢業文憑及監督處證明書并筆記譯述等項呈明候核其在本國學堂或外國學堂得有普通畢業文憑者一併呈驗 三預行甄錄 游學畢業生無論有無普通學畢業文憑均預行甄錄一場試以外國語文并該生專科所需之普通學（如法政文科之地理歷史及格致工科之理化算學）其平均不及五十分者不准與正場考試甄錄未取者准於下屆再與甄錄惟以一次爲限 四分門命題 正場考試分爲兩項第一項試中外文字第二項試科學 第一項試中國文一題外國文一題作一題爲完卷 第二項按照該生等所習專科分門命題每科限定六門以上八門以下每門一題主要者二題須按題全作 按門記分及核算平均之法照奏定學堂考試章程辦理 五考試日期 游學畢業考試定於每年八月舉行 考試分三場間日一場第一場試中外文字二三場試科學

俱當日交卷 六分等給獎 此項考試等級照奏定學堂章程分別最優等優等中等 考列最優等者獎給進士考列優等及中等者給獎舉人均由學部開單奏請驗看恭候 欽定 獎給進士舉人者並加某學科字樣習文科者則稱文科進士文科舉人其法政科商科工科格致科農科醫科仿此 凡考試不及格者准於下屆再應考試惟以一次爲限 七分別職掌 主試官由學部奏請 欽派襄校官由學部遴選奏派均無定員視考試畢業人數多少臨時奏定 主試官命題閱卷選定襄校官所擬試題覆核襄校官所擬分數 襄校官分擬各科試題分校各科試卷 監臨官二員由學部堂官內奏請 欽派所有場前評定文憑分數臨場點名散卷及考試時整飭場規等事均應督率派出各司員認真經理並會同主試官辦理拆封計算總分數及填榜事宜 提調官二員由學部堂官就本部丞參暨各司總辦中遴選奏派管理內場一切事宜及分撥試卷核算分數等事并隨同主試官監臨官辦理拆封填榜事宜 內外收掌官彌封官各二員由學部堂官就本部各司員中遴選奏派辦理收掌彌封等事 庶務官二員由學部堂官就本部各司員中選派辦理場內供給及雜務 監場官若干員由學部堂官就本部各司員中選派監查各生考試 八嚴密關防 設內場監試御史一員專司稽查關防由學部咨取科道各官銜名奏請 欽派 凡主試官襄校官暨提調內收掌彌封庶務等官一經派定均須卽日入場住宿未揭曉以前不得外出俾昭慎重 監臨官二員應輪流在外場住宿以便稽查出入嚴杜弊端 試卷於每卷末頁之左角內填彌封紅號於卷面之浮簽上填寫考生姓名及坐

前清五口官報
號收卷後由彌封官揭去浮簽交提調官分送主試官或襄校官評閱其各項試卷非經主試官評定分
數後不得開拆彌封既拆彌封已知紅號之後不得復將分數增減以杜弊竇 考生文憑分數由學部
評定於拆試卷彌封之後隨同紅號名冊送交主試官以便計算總分數

兩江奏牘

江蘇巡撫瑞 奏蘇浙淺水巡艦合爲聯隊請將營制餉章立案摺 (補錄)

奏爲蘇浙淺水巡艦合爲聯隊謹將營制餉章立案緣由恭摺仰祈 聖鑒事竊查前因太湖界連江

浙港汊紛歧梟匪日益猖獗原有緝私礮船難以制勝經前督臣端方奏明製造淺水巡輪數艘裝配快砲專令巡察太湖及內河一帶欽奉 硃批允准奴才適在藩司任內奉派督辦緝捕清鄉事宜會商

蘇浙兩省添造巡艦八艘合爲聯隊蘇省共購四艘名曰仁勇陪戎係屬鐵質在上海公興船廠訂造又曰振威昭武係屬木質在江南船塢訂造浙省共購四艘名曰宣節翊麾致果禦武均屬木質在江南船塢訂造共計巡艦八艘飭派南洋江元軍艦管帶博千總順爲統帶各按等級分別編配爲左右兩翼蘇省計大隊兩艦中小隊各一艦浙省計中隊一艦小隊三艦合爲一聯隊以收整齊畫一通力合作之效其仁勇振威昭武三艘於光緒三十四年四月工竣五月初一日成軍起餉其致果翊麾二艘於五月工竣六月初一日成軍起餉其陪戎宣節禦武三艘於六月工竣七月初一日成軍起餉其聯隊統帶項下先於五月初一日起支辦公費銀二百兩書記薪銀二十一兩至七月初一日始照額一律補齊起支全餉並於宣統元年正月初一日添設偵探長一員偵探兵八名所有聯隊統帶項下以及巡艦偵探一切薪餉雜支等費蘇浙各半分籌蘇省應支一半薪餉歷於清鄉經費項下撥用現在清鄉公所已截至本年正月底裁撤自二月分起已改由蘇藩司按月撥給其浙省應支一半薪餉歸浙省釐餉局撥給統計

全年蘇省應支薪餉雜費銀二萬九千三百四十六兩四錢浙省應支薪餉雜費銀二萬七千八百五十二兩六錢茲該統帶仿照泰西各國海軍章程斟酌損益訂定營制餉章呈由蘇省巡防營務處司道覆核詳請 奏咨前來除將冊表分咨陸軍部度支部外謹會同護理兩江總督臣樊增祥浙江巡撫臣增韞恭摺會陳伏乞 皇上聖鑒敕部立案施行謹 奏宣統元年六月十三日奉 硃批該衙門知道欽此

江蘇巡撫瑞 奏上海龍門初級師範學堂畢業請獎摺 (補錄)

奏爲上海龍門初級師範學堂畢業援案請獎恭摺仰祈 聖鑒事竊據蘇州提學使樊恭煦詳稱上海龍門師範學堂於光緒三十年以龍門書院改設當三十一年開校之始原照初級師範學堂章程辦理旋以中國興學伊始各小學堂教員缺乏求師甚急勢難待至五年因量爲變通招收各屬諳習經史及普通學已有門徑者節縮教授時期暫定三年畢業以備應用計自光緒三十一年四月開校起至三十三年下學期止第一屆學生修業期滿又第二屆學生於光緒三十二年正月入校肄業至三十四年十二月三年期滿先後由該堂監督呈請由司遴員前往遵章考試計第一屆取列最優等優等共二十名第二屆取列最優等優等共二十四名分別等第給發文憑去後旋由該學堂援照山東福建等省初級師範學堂畢業學生由部核准比照師範簡易科給獎成案造冊呈請核獎等情伏查奏定初級師範簡易科畢業獎勵章程內載由官設立在二年以上成績優著其畢業考列最優等者比照初級師範中

等獎勵辦理考列優等者比照初級師範下等獎勵辦理均令充小學堂及程度相當之各項學堂副教員考列中等者准充小學堂及程度相當之各項學堂副教員又查初級師範學堂畢業獎勵考列中等者作爲師範科貢生以訓導用俟義務年滿以應升之階儘先補用考列下等者俟義務年滿作爲師範科貢生獎給訓導銜各等語今上海龍門師範學堂第一二兩屆學生肄業均在二年以上成績尙優核諸部章二年以上之簡易科畢業年限及山東福建等省奉部議准降等給獎成案均屬相符似亦准應請獎除第一屆考列中等之程恩祐等五名暨第二屆考列中等之袁椿烈等六名例准充當小學堂及程度相當之各項學堂副教員毋庸給獎外其第一屆考列最優等之王景雲等五名第二屆考列最優等之杜應龍等二名均擬請作爲師範科貢生以訓導用俟義務年滿以應升之階儘先補用又第一屆考列優等之高潤澄等十五名及第二屆考列優等之尤志遂等二十二名均擬俟義務年滿作爲師範科貢生獎給訓導銜以資鼓勵而勉師資等情詳請具奏前來奴才覆核無異除將履歷分數表冊咨送學部核明給獎外理合會同護理兩江總督臣樊增祥恭摺具陳伏乞

皇上聖鑒敕部核獎施行

謹奏宣統元年六月十三日奉 硃批學部議奏欽此

江蘇巡撫瑞 奏蘇州中等農業學堂請立案片 (一補錄)

再據蘇州提學使樊恭煦詳據蘇州府知府何剛德詳稱竊維國力增長首在實業振興而利歸於農貨出於地凡工業製造之原料商業輸出之物品莫不取給於農產故農業實爲工商之基礎蘇省風氣夙

號開通學堂林立而實業獨付闕如知府到任後兼充農務局提調卽經稟請開辦中等農業學堂旋因農務局歸併農工商局劃出此項學堂仍歸知府辦理當創辦之初因經費支絀創建非易卽就省城吳縣漕倉廢地建築校舍其開辦經費在中學堂節省項下借撥銀一千兩並於農務局收存領墾官荒地價項下撥洋二千元其不足者由府飭屬籌捐濟用於光緒三十三年正月開工於是年五月工竣選聘教員招考學生入校肄業妥擬課程規則督同教員認真教授此項學生照章三年畢業考驗給憑以資鼓勵迄今兩年以來添闢試驗場五處創設植物園及農品陳列所規模粗備諸生實地研究日起有功效具章程課程暨員生姓名經費表冊並繪具校圖詳司轉詳 奏請立案前來奴才查前准學部咨江蘇省造送三十四年學堂一覽表飭將未經詳報之學堂應將學堂等級功課程度及各項事宜切實查明補報以便稽核等因在案今該府所辦中等農業學堂於光緒三十三年五月成立由府按照定章參酌本地情形妥擬章程課程督同各員認真教授兩年以來添闢試驗場五處創設植物園及農品陳列所規模粗具上年試種早晚粳糯培養得法諸生實地試驗亦有成效可觀自應 奏請立案以廣裁成而資觀感除將送到各項圖冊咨送農工商部查照外謹會同護理兩江總督臣樊增祥附片具陳伏乞 聖鑒敕部立案施行謹 奏宣統元年六月十三日奉 硃批該部知道欽此

江蘇巡撫瑞 奏派在籍補用道張營總辦江蘇農工商務局片 (一補錄)

再蘇省原設農務工藝兩局自歸併商務局後改爲江蘇農工商務局並籌設商品陳列所農業試驗場

迭由前撫臣會同督臣先後 奏報在案上年復經前撫臣札派奏調來蘇之四川補用道熊希齡總辦該局事務隨同藩司認真整頓分科治事條理秩然奴才前在藩司任內公同贊畫甫能逐漸改良今春熊希齡奉派東三省清理財政官遂即交卸斯差經前撫臣札派分省補用道張琳接替奴才到任後張琳因病辭差亟應遴員接替以專責成而蘇省候補人員能講求實業足勝其任者細加甄采實鮮其人查有在籍分省補用道張譽器識宏毅任事篤誠該員前在通州本籍興辦實業成效卓然而於地方公益頗能切實推行不遺餘力且經農工商部劄充通崇海總商會總理亦能聯合商情輿論翕服其早歲服官江西勤於民事政聲亦頗卓著誠爲近今不可多得之材以之派充該局總辦既可通官商隔閡之情當可收指臂相資之效且該員潔已甚嚴奴才知之有素該局專筦實業與他項局所事關地方行政者不同似可毋庸迴避伏查四川商務局江西農工商礦局均經派用本省士紳奴才此次遴用該員實係爲事擇人並當隨時督飭該員審度民情振興物產庶幾實業可以漸裕除俟該員呈遞履歷咨部查照外奴才爲實業需材起見理合會同護理兩江督臣樊增祥附片具陳伏乞 聖鑒訓示謹 奏宣統元年六月十三日奉 硃批該部知道欽此

護理兩江督部堂樊

准度支部咨前督部堂端查辦利濟公司溶浦舞弊結案辦法應准銷案文

(補錄)

咨行事制用司案呈准南洋大臣將滬道查辦荷商利濟公司溶浦挖泥工程虛報挖數冒支工價訊明

南洋五日官報

罰辦情形並與稅司商訂結案辦法善後章程共九條等情詳請咨部銷案等因前來查荷商利濟公司承辦濬浦挖泥工程在簿內將挖數私加假報自上年正月起至該局幫辦專委員發覺之日止通共假報五百船之譜經該道蔡乃煌暨萬守鍾元律師安得森會同稅司好博遜研訊明確本應罰繳現銀因稅務司暨總營造司均爲再三聲請今該公司於原包泥工之外另加挖泥五十萬立方碼合裝駁船二千隻約值銀十五萬不領工價抵作罰款利濟包工本年夏秋之交即可告竣應領工價仍按合同分四年支給約計餘存工款七八十萬就此扣存俟罰挖工畢再予補發至有功此案之巡工尼羅德病故量予旌卹德雷克福改派稅關當差並賞銀一千兩安律師酬洋銀二千元一併由局撥給暨善後章程內載吳淞口高橋沙二處各添派委員一人等因本部查利濟公司捏報作弊暨據查明罰辦自應准其銷案所有善後章程一切辦法均應准如所咨辦理仍飭該關道將前項賞給及扣存各款於銷冊內隨案聲明毋得遺漏相應咨行南洋大臣轉飭江海關道遵照可也須至咨者

護理兩江督部堂樊

咨湘撫部院請分別札委湖南勸業道唐步瀛等爲湖南省出品協會監督

總理文 (一補錄)

咨請事據勸業會事務所案呈南洋創辦第一次勸業會籌備事宜業經分別呈請派員辦理在案查勸業會辦法造端宏鉅應先於各省會及各商埠設立出品協會蒐集本省土產工藝設所陳列定期展覽研求精進以爲明年運甯與賽之預備非有學識優裕研求實業淹通者主持組織斷難收效茲查有湖

南勸業道唐步瀛湖南農工商業學堂監督候補道張鴻年湖南商務總會總理候補道龍璋均於農工商學經驗頗多商情亦極允洽擬懇咨請派委唐道爲湖南省出品協會監督張道爲副監督龍道爲總理以期得力而促進行等情據此查出品協會爲勸業會之模型且啟發各省實業爲效甚速收益亦大所請核與章程相符應備文咨請爲此合咨貴撫請煩查照分別札委俾專責成並希見復至切公誼須至咨者

護理兩江督部堂樊

批阜甯縣堵令稟會訊郭戴氏上控伊夫郭仲楡被戴璧堂子姪連班等謀

殺身死訊供情形由 (一補錄)

據詳已悉希蘇臬司卽飭比差勒限嚴拏戴連全等及一千人證到案質訊確情錄供詳辦至附詳以戴璧堂等不肯呈繳捐照請將戴璧堂監生及其子戴連班職員毋論何年在何處捐納一併斥革之處雖爲懲惡起見究嫌辦理草率現據戴璧堂隨詳上控已批令將伊父子監生職員何年在何處捐納自行呈明並帶照呈驗特此等刁徒仍恐不免狡抗希冀恃符抵制殊不知自開捐例以來名器太濫流品混淆所謂監生職員者幾如恆河沙數非僅爲朝廷不甚愛惜之功名且適爲鄉曲恃符武斷之淵藪既據詳稱控案屢疊劣跡昭著卽先行嚴訊一面追照繳銷有何不可正毋庸拘守文法必待詳革始能嚴審也併希由司核明飭遵仍錄報撫部院暨候批示此致

兩江總督部堂張

札飭各署局所學堂軍營遵照館頒民政財政各表式填送文

札發事案照端前部堂任內准憲政編查館王大臣咨本年二月二十日軍機大臣欽奉

諭旨憲政

編查館奏遵辦統計政要擬從民政財政入手編訂表式酌舉例要開單呈覽一摺著依議欽此合即抄錄原奏連同表式暨統計表總例解說舉要刊印成冊分別咨行欽遵辦理所有此項表式除部表省表已分式編訂外其中尙有事非一署署非一式應由各督撫分行各該主管衙門局所核實填注大致辦法均經詳叙總例暨各表式解說之中或應添列分表以致其詳或應別訂一式以盡其變或類目尙未具備或例案有所更張均可逐一聲明隨時損益應各查照原奏暨總例解說融會貫通依限辦理總期事實賅括經緯分明方爲合式所有統計年限自光緒三十三年爲始而現在三十四年事項亦經首尾完具即可一併查核陸續填報所有應行各署局所表式繁多應由各省調查局照式繪印分發遵辦其有駐防旗營應填事項並由各省轉咨各將軍副都統城守尉等查照一體辦理彙齊咨送以期迅速重要政除分行外合即咨行貴督查照辦理可也等因當將原奏例要解說民政財政統計表札發南洋印刷廠照式刊印嗣因未據送到又經飭催去後茲查接管卷內據該廠將原奏各表排印齊全呈送核辦等情由樊護部堂移交前來查統計之學各國皆有專門其中事類至爲繁曠而以民政財政兩端爲最鉅現值預備立憲時代非周知盛衰消息之原何以具損益措施之用故編纂年鑑比較國力尤爲政入手切要辦法茲本部堂蒞任伊始既先准憲政編查館咨送民政財政各種表式應即飭由各署局所各學堂新軍防綠各營一體查照原奏及總例解說舉要參酌該管事項按照表式詳晰填註依限飛

遞造送以二分送調查局及清理財政局以一分送本衙門聽候復核彙案咨報其江甯京口駐防各旗營應請江甯將軍京口副都統轉飭左右司及各協領一體詳查照式填送此係奉館統計調查要件不得稍有敷衍舛錯致干駁詰除分別咨行外合就刷印原奏及總例解說舉要各種表式札發札到該口即便依限造送並轉行所屬一體遵照毋稍逾延干咎切切此札

兩江總督部堂張 批廣德州孀婦沈金氏稟氏子沈恭煦被冤請雪由

前據該州詳據建平縣稟查訪明確氏子沈星甫卽恭煦勾結黨類唆訟害人訪諸輿論衆口一詞並有歷次查拿案據可憑似未便因具稟原告姓名均屬虛捏遂置積慣訟棍於不論請將沈恭煦衣頂先行詳革嚴拿歸案訊辦等情業經端前部堂如詳批准在案茲據稟各情沈恭煦如確有冤抑儘可親身來轅呈訴乃匿不到案輒令七旬老母出頭遞稟顯係情虛畏罪仍仰安臬司會同提學司遵照前批迅飭嚴拿究辦以除民害稟抄發

甯藩司樊 批六合縣陶令鑄堯詳陸王氏家違禁演戲訪聞提辦事涉家丁業已解府審辦由

據詳已悉該令因六合演戲之風極盛特行禁止固屬因地制宜陸王氏在家演戲有違該縣禁令而家丁亦復違禁往觀况係逕入人家實係兩有不合陸王氏遽將家丁宋餘捆倒甚至剪落髮辮以違禁演戲之家竟敢出此可謂兇橫惟剪髮之舉多以待圖姦婦女之人來詳謂陸王氏窩娼得毋於觀戲之外尚有別故耶刁風固不可長家丁亦不可縱既云捆毆多傷究竟傷何部位曾否驗明開單存卷本司於

此案絕無成見惟此等小事拖累多人解府質審實屬無此辦法該署令果無徇私挾忿之心則秉公斷案何畏潑婦逞刁觀其稟請提府已覺無能無識仰江甯府迅委讞局能事之員馳往六合先查後訊秉公斷結報奪陶鑄堯勿庸會訊來詳自言到任卽禁演夜戲而本署家丁三人首犯主人禁令夜入人家觀戲是奴僕先瞧主人不起而陶鑄堯之形同木偶已可概見應否撤任察勘姑候委員訊明再奪仍候督憲批示繳

甯藩司樊 批如臬公立師範各學堂公稟稅契捐擬請照舊帶收或仿照興化辦法由

據稟及清摺均悉學堂善堂各係政治之一端經理其事者自不能不多請款項以期開支便利日就擴充地方官身膺庶務隨在有補助之責不留有餘則顧此失彼稍拂人意則衆謗群疑論其事原屬兩難究其實貴求一是查稅契章程每銀一兩提錢十文作爲學堂善堂經費如有不敷由各州縣設法彌補奉行業經半載財政局前以該縣意在加收故援興化吳令請將辦公經費十文及二成紙價勻撥學堂等處之案批飭仿照辦理無非勉該縣以竭力維持並非聽各堂之盡情索取若如來稟所言稅契提款全數撥歸學堂善堂試問該縣別項新政又從何處著手辦理地方公事總須官紳協力不可各懷意見此案學堂經費爲重善堂次之所呈人數學堂少而善堂多究竟各該堂辦事如何每歲實需支用若干約計短少若干仰通州切實查明飭令該縣量爲接濟毋任藉口公益致起衝突而壞成規至書吏加收稅錢大千例禁一併密查務得確情如果實有其事立即指提嚴辦稟候核奪勿延并行各該堂遵照稟

摺均發仍繳

甯藩司樊 批大挑教職姜書欽等稟請禁鹽城海州米麥出口由

嚴禁米麥出口久已三令五申據稟海船藉口販運雜糧任意夾帶如果屬實地方官所司何事殊堪詫異現在水旱不時豐歉未卜亟應顧全民食藉定人心仰海州暨鹽城縣迅速切實查明倘有好商影射私販卽行嚴拿懲辦以防效尤至駐鹽查禁委員王通判國楨平日聲名如何並仰淮安府查明稟復均毋違延稟抄發

甯藩司樊 批李富揚稟認盜庇盜疎縱不獲求示提懲由

該民家被盜行劫拒傷事主該縣豈有任聽差保庇盜不拿之理詞中牽連別案控及官長是並非催緝矣仰江甯府速飭該縣比勒差保人等並加派幹練兵役嚴緝賊盜務獲究辦毋稍玩縱以免藉口

甯藩司樊 批賈王氏稟次子桂年以訐直爲義務通州因此訪提一案由

昨據通州具詳該氏子賈桂年係著名訟棍臚列案據請先行斥革俾便嚴訊已批准如詳斥革矣該氏子在州則供詞驕抗稟司則語意狡健州詳所謂睚眦薑芥日尋仇怨害羣之馬有妨治安者也仰通州迅將查列各案先行切實訊究毋任刁訟

甯學司陳 牌示江西高等農業畢業生程時焮領咨赴東游學文

牌示事奉前護督憲樊批江西高等農業學堂畢業生程時焮稟自備資斧懇給咨赴東留學由蒙批據

稟該生前在江西高等農業學堂預科畢業因本科尙未開辦自備資斧懇請給咨赴東留學等情足見殷殷嚮上志趣可嘉且東文語既有三年程度自可直接聽講核與部定游學章程相符合應准咨送所有咨文一角隨批印發希甯學司查收就近給領並取具啓程日期報查此致稟抄發等因並咨文到司奉此合行牌示爲此示仰該生即便遵照來轅領咨起程仍將起程日期具報詳咨毋違此示

江南商務總局 批江浦縣稟復浦口商會私刑擾民訊斷情形由

據稟各節核與江甯總商會查復徵有異同總之事關竊案係屬刑事訴訟理應報明地方官訊辦商會何能率派團練查詢練長吳冠之擅將耿林兩姓吊打尤屬荒謬姑念該總理業經退職吳冠之亦經該縣責懲收押從寬免究近來商會辦事往往不明權限貽人口實亟宜預爲防範應由該縣傳知新總理勿再干涉地方官行政之權致滋事端是爲至要並候通飭各屬商務分會一體遵照餘如所議辦理仰卽遵照仍候移知藩司一體銷案此繳

江南商務總局 批職員張必濤稟墻倒屋傾叩求飭讓修理由

此案本局昨又照會總商會變賣牛財或飭梁德揚暫行領售原爲速令讓房免滋拖累起見今據稱擬將牛財交保或由該商先墊租覓地存儲將來再行揭扣等情查王順文保出後迭飭原保交人尙無著落何能再將生財交付至梁德揚等欠款計有三戶爲數甚鉅即使生財售罄亦尙恐不敷難抵若再從此款內扣付租金所餘更屬無幾所議均不甚妥應候仍照催商會查照前議迅速辦理封房本出於不

得已決不令該監生久久受累也

甯屬諮議局籌辦處 批山陽文生高溥報告准郡育嬰堂司莊舞弊懇請切實調查整頓由（附

原稟一

來牘具悉堂董營私司莊舞弊以地方有限之公產供若輩無賴之侵漁事屬普通情殊可恨况以百餘名額之育嬰堂現僅有十數名所云穿嬰孩喫嬰孩及賣嬰孩一節如果屬實尤堪髮指惟本處係爲籌備諮議局一切事宜而設此事之調查整頓應稟由自治總局核辦且該生所稱諮議局調查員想係前辦該邑選舉之調查員初選事竣其名目卽應銷滅茲猶沿用亦殊未合既該邑有如此劣董不妨聯合公正士紳呈請地方官切實查辦本處固不便越權也原稟發還此批

敬啟者竊思秉公者毋挾私情而循私者難逃公論理固然也查准郡育嬰堂善舉公地也堂中之田公田也每歲出入開支亦公項而公用也卽管理堂董皆妥選公正之人以司其事安有一毫之私以舞其弊乎有之則自司莊顧玉崑始查顧玉崑係堂董顧雲松之子前經文生吳春田喬懷芬先後稟控司莊舞弊情形荷蒙提憲委派准軍廳查復顧董以父子之嫌管理堂務恐遭物議因保王益安接辦當奉提憲批准生查王益安與顧董至戚去歲秋收之時依然顧董之子到莊收租蒙混可知復經普濟堂董稟稱王益安已於去年三月就館奉天省明爲王姓司莊實則顧姓辦事特保文生周鏗接辦以杜其弊顧董以權屬他人復保汪寶楨充司莊之任又奉提憲仰淮安府飭山陽縣查復旋奉該

縣照會育嬰普濟兩堂董公同查明周汪二姓誰可勝任彼時顧董並未公同查明反稟普濟堂董越俎多事及查汪寶楨又係顧戚顧董知汪不稱其職復保王霞生管理且王霞生年僅十餘歲係王益安之子莊務並不熟諳至今仍爲顧董之子所假冒雖奉提憲批查嗣經顧之堂兄舉人顧震福在府縣署代爲運動又兼乃弟爲提轅書房稿生從中舞弊竟然無恙嗚呼我山陽善舉已屬無多惟此項公田約計每年當有餘資以上何董經理原來兩千餘石租稻尙能續置一千有餘刻下三千餘石租稻且稻價加倍於前而每年仍患不足究不知經理之人良心何在也莊務固如此若堂中之弊尤不忍言原定收養嬰孩額數一百餘名均在堂中宿膳現聞僅十餘名堂董不敢稽查以司事侵吞堂款故也司事不畏堂董稽查以同一侵吞堂款故也至於上下其手穿嬰孩吃嬰孩以及賣嬰孩以肥己種種積弊天理難容若當清理財政之時不加整頓則我山陽永成黑暗之天日矣爲此據實報告敬請切實調查整頓實爲公便

署淮運司吳 稟督憲據正陽局徐牧稟查豫販方昌蔭等兩次稟控各節實在情形文

敬稟者竊據正陽督銷局徐牧之稟稱案奉督鹽憲端批據豫販方昌蔭等稟淮北滯銷約有三因懇恩切實整飭又稟督銷局掩飾因循再懇痛除積弊各等情先後奉批轉飭查明併案稟復以憑察奪等因並抄黏原稟下局奉此伏查方昌蔭等前後稟詞支離駁雜而究其大旨無非借破壞輪章之名以歛財肥己而已其第一次所稟核與上年赴部呈控二事意義相同前奉轉飭澈查業經詳晰稟陳並蒙督

鹽憲批據稟已悉此案方昌蔭等赴部以獨行勒索挨號扣留浮徵偏枯等弊控請飭查既據該牧將公行辦理情形詳細查明並無浮費仰候據情咨請度支部查照至另單所陳方昌蔭等又挾張新泰之故智重赴甯揚呈控藉圖歛資肥己實屬可惡嗣後如再飾詞稟控卽行飭交該局傳集湖豫各販及行戶人等互相質証以杜欺誑倘敢避不到案卽將控案註銷此繳等因在案今方昌蔭等又以試辦散輪一年爲請並稱銷數如果不增再行挨輪未晚等語似覺持之有故言之成理惟查正陽輪章行之已數十年歷辦局員所以兢兢循守者誠以販情之所安釐源之所係一旦輕易更張恐蹈從前之覆轍在若輩不擔責任固不妨爲孤注一擲之思而試思此一年中江皖豫三省餉需票湖兩販生計關係何等重要前年革董張新泰赴豫呈請提鹽願包豫省歲銷四十萬兩經豫省尖關兩局委員傳集販董再三籌議卒以張新泰所稟毫無把握稟請豫省作罷今若遽以空言敗壞成法致因散輪貽誤咎果誰歸此知州屢次詳陳不敢輕於嘗試者也若夫淮蘆成本輕重懸殊知州瀝陳豫岸病根不止再三請籲計兩年以來裁除豫販公所捐款稟減江南要政捐並酌增豫省銀價商定鐵路銀價已爲豫販每包減輕本銀二錢有餘近且蒙督鹽憲以減免豫價二文之請援案入告矣是豫販一切苦衷上下並無隔閡第販戶散漫尠有聞知而方昌蔭等素非真正豫販故尤爲夢夢耳其第二次所稟首以變通挨輪三戶尤屬弊中之弊爲言語意似更荒謬查正陽輪章鹽色向分十一等依到輪之次序每等以一戶首先出售俟第一戶賣完再接賣第二戶歷年相沿如是今春因關存鹽數較之去歲爲多爰諭商湖販姑徇豫販之請藉

作招徠之計飭令到輪之前三戶同時出售隨買販選購既可杜湖販翻船灌漚低出高樣之弊又可令買販自由已於稟復方昌蔭赴部控請飭查前案時另單申明在案自示諭之後各湖販及湖販船戶雖覺三戶並賣則每戶空艙結賬較前稍遲唯深知知州此舉爲顧全大局起見行之數月毫無異詞至豫販來關買鹽均欣然以較前便利爲言今方昌蔭等乃謂弊中之弊又不能指實其弊之所在抑思現在變通者祇此到輪之前三戶耳設竟如所請舉全輪之數十百戶而散之其弊尙可勝道耶所請者在彼而所訾者在此恐方昌蔭等亦無以自圓其說矣况此項三戶並賣辦法其宗旨在損湖益豫若豫販以爲有弊則改還舊章固自易易惜在關豫販均不認方昌蔭爲代表未能衆議僉同耳至貼補湖虧一項本之於丙午缺產加價由一兩五錢減至一錢湖販創鉅痛深勢將紛紛歇業故知州於到差時集湖豫各販公同議定以彌足錢虧再行停止等情稟請備案以示羈縻綜計前項虧款共二十七萬金現僅彌補十餘萬而方昌蔭等之意以爲借運在兩年之前不應彌補至兩年之後殊不知一兩五錢之加價係海分司稟定之案湖販捆鹽時實已照數付與票販當時若無流攤辦法則駐關湖販一綫奚延正陽早成廢岸豈能待至今日今乃鍛鍊其詞創爲每斤九文之說究係若何牽算令人百思不解詢之在關豫販亦覺訝然足見方昌蔭等並未厠身關市故不啻扣盤捫籥情狀迷離祇因歛得訟費不得不組織訟詞而又恐徒撫陳言不能動聽稱引失據職此之由訪聞該販稟詞係稟內列名之上官邦彥主筆伊家並未業鹽前經知州傳諭豫販董事函約來關以便邀齊湖豫皖各販三面環質如有可採不妨嘉納卽

有舛誤弗予深究事更兩月遠遁無踪其意何居難逃憲鑒伏思汝光十四州縣商民向稱樸直從前科則不平邊界侵銷備受強鄰之害而蚩蚩順則知識毫無雖利害切身曾未聞有建一言抒一策者自光緒二十九年蒞前總辦革辦豫董張新泰該董因正陽無可容身遂迭次赴豫赴甯呈控冀達其提鹽赴尖之目的而數年訟費搜括私實皆吾豫商民膏血也近更每况愈下以不諳鹽務之人師其故智在烏龍集地方歛費興訟真正豫販畏其毒螫不敢誰何而此輩又苦於訟止則利竭故從來不肯到案恐致一朝敗露則其術勢難再售正陽局員所守者係多年成法所持者係三販公理原不能因一二人之私言遽爲搖惑惟值此商力困苦之時既不能多輕其成本又不能嚴禁其訟費殊覺愧負衆商且長此控告不休煩擾實甚設如奕者之舉棋不定意存遷徇改易多年之輪章則正陽鹽務前途必有擾亂不堪之一日知州尸位兩年對於衆商相處久而不無感情對於公家負責重而難忘遠慮現雖決然求去要不忍知而不言苟且卸責臨穎徬徨憂心如熾擬懇批飭接辦之員仍行諭飭方昌蔭上官邦彥等來關質証澈底研求俾昭大信如再有藉詞惑衆歛費肥己情事卽稟請照例懲辦以昭炯戒而肅綱等情據此伏查方昌蔭等一再上控支離閃爍顯係有人從中捏唆爲藉訟生財之計前據該牧稟奉憲台批示如再飾詞稟控卽行傳集湖豫各販及行戶人等互相質証以杜欺誑等因乃經該牧指名訪傳迄未投到更見情虛畏匿遁辭知窮惟該局現奉另委接辦誠恐新舊交替之際難保若輩不故智復萌意圖嘗試應請查照該牧所稟札飭接辦之員仍行諭飭方昌蔭上官邦彥等赴關質証澈底研求俾昭大

信而杜藉辭是否有當理合據情轉稟仰祈鑒核批示祇遵深爲公便

津浦鐵路南段購地局 申江督憲商借江邊洲地情形並錄呈合同底稿請立案文

申請立案事准南段總工程司德紀函開浦口江邊至城內一段刻因急欲先築路綫一條從江邊沿小河而行此段路綫地基尊處能否向地主熟商暫爲租用以一年爲限俾應要需並祈飭派委員至浦口會晤工程司查克由該工程司指明應用地段及將圖樣均可當面指閱等因准此當經職道等派職局提調羅牧運經會同江浦縣鄺令兆雷往晤查克工程司查勘該支路之綫由新河口左偏起沿河向北直趨浦口城之金湯門前數十武與正路相接所有經過占地方江邊一段係商埠之地至沿河向北則爲九袱洲柳洲及德運堂之地該工程司因江邊車站北趨之正路綫皆係洲地勢低窪時屆春暮轉瞬潮水漲漫欲築不能金湯門內車站應用材料急須運入其另勘支路一條亦自勢不容已隨經該委員等傳集各業戶妥議租價該業戶等聞公家止以一年爲限卽許退還均願將地情借不領租價惟求寫立合同執以爲信所注意者尤在挖廢地面之損失且須載明隨工用土並不得以此人之土填他處地內等情所有三洲紳董及各業戶來見均諄諄以此爲請職道等因念地係情借各業戶要求訂立合同亦尙在情理之中未便遽卻至挖廢地畝許由公家用畢代爲填平而該業戶以公家代填恐涉草率彼時無從呼訴是以一再籲懇酌給填價現經議定俟支路竣工核計實用土方每方給銀元六角先行給領其日後自填與否各聽其便商之羅道國瑞汪道樹棠均以爲然隨經職道等會同南段總辦與

該業戶等寫立合同自宣統元年三月二十日起至二年三月二十日止一年限滿即將該地退還所擬各款亦皆列入分寫五張均經簽字一存職局一存南段總局餘三張則分交各業戶收執至此項土方給價並應發青苗價銀請歸專款列報惟占江邊商埠之地經職局移商商埠局旋准移稱準於秋間動工築填占用之地止能借至本年八月爲限等因當經職局移知南段總局能否照限讓出尙未據復至明年三月限滿之時恐在職局已撤之後其分別交還各業戶之地應歸該總局辦理合併聲明所有工程司由江邊碼頭另勘支路借地立約並土方青苗價銀請歸專款列報緣由謹抄呈合同並將該路綫寬長丈尺開單除報督辦幫辦兩憲外理合備文具申伏乞憲台鑒核恩准立案施行實爲公便須至申者

辦理通海墾牧事宜翰林院修撰張 咨甯藩司查明陳少峰朦控蘇狼兩營兵田一案文

咨明事五月二十三日准海門廳梁丞照會內開五月初四日奉藩憲批據紫霞學堂管理員陳永燾稟稱竊先祖川沙營參鎮陳施華在日置買陸玉和案蘇營兵田十萬步光緒元年助入本邑賓興科舉停後三十二年稟縣開設紫霞學堂生徒四十七名費甚支絀即將潮冲坍圩傾資修築原佃試種以裕學費生稟蘇鎮憲札委查復並稟海門廳援案示諭修築駭被前阻河上漏丈之張雲梯卽如峰令夥周徐坤糾惡百餘人持械凶霸蔡廷相被伊揪縶拖傷往訴殿撰勸諭不願回函抄電并向玉和之孫毓賢理論渠卽字洲保倪則芹始云議丈終云并入公司字跡可證生因是報告教育會王君清穆函至勸學所

移廳諭禁再控如峰阻撓學校奉批傳驗執照等諭生卽稟縣吊卷牒驗附稟嚴懲徐坤禁阻如峰剗諭
毓賢秉理赴公奉批垂長管業等諭未爲不是若據而行則翻案而生早奉仁憲札諭擇阜試種已管皆
非勢致丈人公司其何能管而界外如峰圩內讓下餘地作何措置目圖了然况蘇狼兩營四百頃除守
阜圖管已熟地百五十頃又公司二萬三千九百零三畝五分零四毫尙有圍剩三十餘萬步終爲荒灘
不然亦難爲業生謹抄蘇鎮憲進呈坵圖并公司界圖暨前查勘釘給具結示諭租串統乞鑒核但該地
數十年成熟老圩案可吊圖核乃張陸倚勢逼勒覬覦公產目無法紀若不號叩親提究吐何以重學校
而肅法紀謹叩電鑒迅賜親提押吐校田仍復舊管以維學校而正土風學校幸甚地方幸甚沾仁上稟
等情奉批所稟有無捏飾仰海門廳迅速查明據實稟復勿延等因並抄稟到府奉此查此案前據崇海
初等學校校長陳炳麟稟將父置蘇營圩外兵田五萬步撥充紫霞學堂經費請准示諭修築當經章前
府出示曉諭旋准貴公司移據陸毓賢張雲梯函告陳炳麟卽廷梁朦請示諭侵圍已入公司之地移請
吊銷示諭傳驗執照等因均經章呂二前府先後飭吊傳驗嗣准崇明縣牒送陳廷梁呈案執照四紙查
核陳永燾迭次具稟呂前府又以府署原辦之卷年久遺失無從查考批著親實執照送請貴公司查明
核辦在案茲奉前因合行備文照會貴公司請煩查照來文迅賜查明詳細見復以便核辦等因到敝公
司准此查此項兵田於道光年間由張雲梯之祖張商廷陸毓賢之曾祖陸玉和同時向蘇狼兩營承佃
蘇營三百頃狼營一百頃當時張陸二姓迭次京控議結承佃各業俱照奏案老嫩配搭肥瘠圖分頒給

執照按圖註冊東西則挨號分訂南北則垂長管業界限分明具有案牘可考陳施華所買蘇營兵田十萬步按查圖冊在陸玉和案東十號內第二號該地南北垂長計二千六百六十二弓零照垂長管業以縱求橫計地十萬步闊應三十七弓零爲陳應管業之地位乃施華於同治陸年間在兵田南頭與民田接壤處擇肥圍築計該圩南北垂長一百十八弓東西徑闊四百餘弓核計圍內地五萬餘步而東西任意放闊侵佔他人之地至四萬餘步陸姓據案理論將地充公罰入賓興事未成訟至光緒二十七年敝公司開辦所有兩營未圍兵田奉前督憲 奏准飭蘇狼兩鎮將地入公司股分而承佃各業向公司收回贖本曾於三十年查案請諭原辦子孫張董雲梯陸董毓賢出任清理兵田事宜按冊收照給以相當之價值爲兵田與公司交涉之收束二十三年有崇明縣人陳廷梁卽少峰陳炳麟陳永靈皆其化名以改充學費之名佔撥歸公司之地報告崇明勸學所咎張陸藉口公司未便進行等語當將越圍侵佔具復在前又於三十四年二月在久隆鎮商會邀集陳廷梁張陸二董與崇海紳士十餘人開談判會衆憑圖案咸知陳曲陳亦無理可辨遂依公議判結七月中陳又朦請章前府出示修築率衆興工敝公司曾遣人勸止並招致陳廷梁據理開導張陸二董以有清理兵田亦責之遣人理喻不從乃於八月間移請章前府吊銷示諭傳驗執照經呂前府批著將執照親賣公司核對迄今並未送到其執照究係坐落何號是何人名無從查核總之陳廷梁所有兵田在敝公司未開辦以前有舊圖冊爲據應垂長管業不可混同團管侵佔在敝公司既開辦之後有前督部堂核定新章爲據當地領價不能再行圍築其從前

圍築確係侵佔他人之地至四萬餘步既經罰入賓興會勸陸董毓賢讓其管業不復深追何從更有覬覦公產糾惡凶霸之事其未圍地五萬步自應照章領價若仍聽其如前越佔不但違背垂長管業之奏案且與兩營入股章程亦相抵觸況敝公司收回未圍兵田五百餘萬步若盡如陳廷梁行爲公司大局且爲破壞張陸清理兵田何時了結乃陳少峰一味狡詐又復朦控貴轅據其稟稱蘇狼兩營兵田共四百頃除熟地一百五十頃又公司二萬三千九百零三畝五分零尙有圍剩地三十餘萬步云云核之圖卷迥不相符究不知其所稱地數有何根據圍剩之地係何處所飾辭纏訟是明明與清理兵田張陸二董爲難殊屬無理取鬧除移復海門廳請提陳少峰到案呈驗執照按地領價完案息訟外相應備文咨明爲此合咨貴司請煩查照施行須至咨者

外省新政

東三省總督錫 奏遵 旨考察東三省情形裁併差缺摺節經費摺

奏爲遵 旨考察東三省情形裁併差缺摺節經費恭摺仰祈 聖鑒事竊奴才承准軍機大臣字

寄宣統元年三月初四日奉 上諭有人奏東三省冗員太多用款太鉅亟宜依照內省改定官制一

摺著錫良到任後體察情形妥籌辦理據實具奏原摺著抄給閱看欽此跪誦之下欽佩莫名奴才伏查

東省自改設新行省以來庶政繁興規模式廓設官較內省爲衆用費亦較內省爲多其時總司核定官

制王大臣改定官制通則尙未頒行東省原議官制本係試辦故先後奏設各缺於三省已非一律與原

奏亦多異同今既屢致人言自不能不酌議變通以期妥洽茲就原奏各節悉心考核有實宜裁併者有

毋庸更改者有應從緩議者有礙難照辦者謹爲我 皇上縷晰陳之如原奏內省督撫同城者均巡

撫裁缺奉天似宜依照歸併以專責成一節查東三省總督建駐署於奉天吉江兩省各建行署原擬隨

時周歷商同三省巡撫辦理外交內治一切重要事件旋復議總督移駐長春以便控馭三省駐紮奉天

原非久制今則總督每年巡歷吉江爲時甚暫移駐之議亦難遽行遵照外省官制通則總督所駐省分

不另置巡撫卽以總督兼管巡撫事自宜將奉天巡撫一缺裁去以專責成惟該撫臣程德全現甫奉

旨補授應否裁撤之處恭候 聖裁又原奏左右叅贊一司用人一司行政度支司專司財政今以

用人行政理財歸併於布政司既節費用又免分歧則左右叅贊及度支司均當裁撤一節查奉天左右

兩叅贊暨所領承宣諮議兩廳奴才到任後業經奏明裁撤度支司有總筭財政之責東三省並未設有

布政司自可毋庸議裁又原奏民政司之事巡警道足以辦理何必十羊九牧自取糾纏似民政亦毋庸另設一節查巡警僅民政之一端民政可以包括巡警巡警不能包括民政奉省巡警道缺業經前督臣徐世昌奏裁併歸民政司辦理現設民政司一缺自未便再議裁撤又原奏現擬融化滿漢旗務司毋庸另設卽有應辦之事奉天副都統亦可代辦一節查奉天設立旗務司專司從前將軍衙門及

三

陵內務府各項旗務而尤以籌辦八旗生計爲專責惟現值化除滿漢畛域之際且憲政成立後八旗舊蹟皆應通變自應將奉省旗務司一缺卽行裁撤做照吉省設立旗務處而以該司原辦之事屬之又原奏蒙務司之事由督署設一科卽足辦理何必另設一司徒耗鉅款一節查奉省並無蒙務司惟省城現有蒙務局係屬爲規畫全盟興革事宜而設因辦事尙無的款業經奴才奏請裁去該局督辦一差以節經費又原奏奉省勸業道之所布置祇鶩虛名不求實際乃每歲用款多至六十餘萬兩現又新設農官紛擾更甚今以其事或歸之商會或歸之農會公款之所省甚鉅地方之獲益甚多則勸業道及農官似宜緩設一節查奉省勸業道衙門暨所屬各局場所每年用款六十餘萬糜費頗多現已大加核減年可節省銀三十萬上下該道管理事件較繁未便遽議裁撤至農官現未設立且乏農業專門之員自應暫從緩議又原奏提法司爲民刑之總匯既屬高等審判卽可與地方審判直接則廳丞及高等審判似宜毋庸另設地方審判附入府署初級審判祇設一處附入縣署卽以府縣官充檢察之任一節查提法司職掌係管理司法上之行政事務監督各審判廳並調查檢察事務奉天事較繁蹟未便兼任審判現在行政司法正謀分立凡已設審判廳處所亦未便以府縣官兼充檢察又原奏各局處所名目甚繁擇其

尤切要者存之其餘亦盡行歸併一節查奉天省城各局處所多係另派道員專辦奴才到任後業經迭次裁併如裁東三省支應處歸入度支司裁礦政調查局歸入勸業道裁省城牛馬稅局歸入稅捐總局又以省城工程總局 欽工局探訪局鄉鎮巡警總局併歸各司暨地方官兼辦現存局所均關切要應免再裁又原奏既有三司兩道不必再有僉事每司道署中擇候補人員才堪勝任者分科辦事一節查東三省官制各司道每科設僉事一員現未照章盡設惟首科僉事爲各科領袖職務重要類皆辦事得力之員揆之東省情形實在相需未便更議其餘各科毋庸增設僉事以省冗贅至各司道署科員業經大加減裁仍飭由該管司道隨時察看去留以足敷辦公爲度又原奏吉林省巡撫以下設藩學臬三司及交涉巡警道首府分理其事其餘官缺皆宜酌裁推之黑龍江巡撫以下設藩學臬三司及首廳而交涉巡警爲事無多道缺似宜緩設一節查吉林現設交涉司民政司提學司提法司度支司勸業道各一缺黑龍江現設民政司提法司度支司各一缺所有巡警事宜均由民政司兼管江省則併無交涉司若照官制通則裁民政度支兩司改設布政司則巡警須另設差缺用費未能節省官制徒涉紛更應請悉仍其舊惟江省政務稀簡所轄僅十餘州縣現設四司事少官多擬請將該省度支司暫行裁撤歸併民政司兼管以免冗費又原奏奉省每歲進款不下五百萬兩官之廉俸及委員之薪金約需一百萬兩練軍一鎮約需一百二十萬兩辦公及雜用約需一百萬兩尚有數餘可以協濟吉江兩省一節查奉省出入各款不敷甚鉅通省額支各衙署局處廉俸薪津經費役食祭祀等項按現時核減年需銀二百零五萬五千餘兩各學堂及留學生經費年需銀六十九萬三千餘兩督練處並所屬各學堂局處暨陸軍

二標奉軍五路安海綏遼砲艦河防捕盜等營各薪餼以及淮軍津貼各營軍裝年需銀二百二十萬零四千餘兩八旗俸餼津貼年需實發銀四十九萬三千餘兩又加調陸軍第一混成協自本年六月起年需餼銀七十二萬兩以上各款已共需實銀六百一二十萬兩此外一切活支及特別用款約需銀二百餘萬無論如何節省萬難敷用焉有餘款可以協濟原奏似未悉奉省財政出入情形又原奏奉省之官銀號吉江兩省之官帖局均成本無多紙幣甚夥官場之取携甚便紙幣之應付殊難亟宜及時補救改設大清銀行一節查東省現銀缺乏半恃紙幣以資周轉本金太少出帖太多殊非所宜然目前若遽阻發行無現銀爲之接濟官款既窮於應付市面亦立見恐慌非僅恃設立大清分銀行所能補救奴才此次巡歷吉江已分飭澈底清釐限制出票應俟統籌辦法再行奏明辦理綜核原奏各節大率不外裁員減費藉紓物力而恤民艱奴才到任計減裁兩廳汰冗員併局所並先自革除浮費爲僚屬倡前經奏明每年可省銀四十萬兩嗣據各署局所陸續呈報裁減通盤核算每年實可省銀一百餘萬兩於財政不無裨益奴才忝總三邊責大任重庶政現待人而理凡事又非款不行苟有需用之人才應用之款項斷不敢存省事惜費之見自隘規爲而際此款絀時艱亦不敢虛糜公帑曲徇人情上負朝廷澄叙官方綜核名實之至意所有考察東三省情形裁併差缺摺節經費緣由是否有當除分咨查照外理合恭摺覆陳伏乞 皇上聖鑒訓示再擬裁奉天旗務司司使等缺如蒙 允准應俟奉到 硃批再將裁缺人員奏明請 旨辦理合併聲明謹 奏宣統元年六月二十二日奉 硃批奉天巡撫事宜另候諭旨餘照所請該部知道欽此

藝文存略

謝午帥惠枇杷啓

樊山

昨頒杏子今拜枇杷歡喜承筐勻圓盈斗熟透黃梅之雨甯知金橘之霜襲蠟衣以爲丸
忍拋金彈堆玉盤而成塔亦是黃皮五月香濃四時氣備殊老食之而美或借解蠶蜜之
饑洞庭得汝差強誓不共臬鹽而賣入青李黃甘之帖獨高此子之聲名問南梅北橘之
村誰是側生之奴婢藥囊採葉每致欸冬之疑果廠煎膏能止涼秋之嗽憶當日香生扶
荔成陰何異於葡萄記去年貢入 頤和此味已同於社飯繼櫻桃而薦寢天鑒孤忠共
棠芾以流甘地蕃五果老饕拜賜稚子騰歡意在取實而遺華文貴剝膚而存液相如賦
此嘗笑其無能名

上林賦有盧橘而無枇杷

明妃羈然定訝其渾不似矣欣承嘉貺輒貢詹言

卷之四

雜考

三